

PIHOPA MOTUHAKE.

Ki te Etita.

TENEI kua kite iho i o korero mo te whakatu pihopa motuhake mo te Hahi i Roto i te iwi Maori. Ki taku nei whakaaro kua uaua tenei take. Kaati, ka hoki oku whakaaro ki nga kupu a te Karaiti i hoatu ai ki ana akonga: "Haere koutou ki te ao katoa, kauwhautia te rongopai, iriiria i runga i te ingoa o te Matua, o te Tama, o te Wairua Tapu." "Kia aroha koutou tetahi ki tetahi," "Kia aroha ki tou hoa tata ano ko koe." "Ki te mate kai tou hoa riri, Whangaia, ki te mate wai, whakainumia," "Kua hoatu noa nei e ahau ki a koutou, me hoatu noa hoki e koutou," "Kia tiaho ra ia to koutou maramatanga ki te aroaro o nga tangata, kia kitea ai a koutou hanga pai, kia whakakororia ai i to koutou matua i te rangi."

Ka kotahi rau nga tau o te whakapono ki Aotearoa nei, a katahi ano ka mate kai, ka mate wai, te iwi Maori ki tetahi pihopa motuhake mo ratou. E tika ana kia aroha mai nga pihopa pakeha ki te inoi a te iwi Maori. I homai e te Karaiti te rongopai ki ana akonga hei tuku haere ma ratou ki tena whakapaparanga, ki tena iwi, ki tena reo a, huri noa te ao.

Ma te whakaae mai o nga pihopa pakeha, kia whakamana te inoi a te iwi Maori, e tono nei ki tetahi pihopa motuhake mo ratou, ka taea ai te whakarite o te kupu whakahau a te Karaiti: "Haere koutou, kauwhautia te rongopai ki nga wahi katoa o te ao."

*Heoi ano,**—Na Te Wheoro Poni.*

Ohinemutu.

Hune 17, 1926.

HE MIHI.

Ki Te Toa Takitini.

TENA koe, te puhi o Aotearoa, te putiputi pai, ataahua, o tena marae o tena marae. Kia ora tonu koe. E tama tenei ka tukua atu nga kupu whakamoemiti mo te kaha rawa o tou maramatanga te tiaho iho ki tena marae ki tena marae, me to kaha ki te whakaoho i te hinengaro e puhoi ana i tena huihuinga i tena huihuinga.

He mihi ki nga marae maha o Aotearoa me Te Waipounamu, tena koutou i roto i nga manaakitanga a te Rungarawa.

E aku tuakana, hoki mai ra ki te raporapoi i te tangi apakura a ta tatou puhi e paoho nei tona reo mo tetahi pihopatanga motuhake mo tatou mo te iwi Maori. He kupu pepeha na oku tipuna:—"Whiria te kaka, tuamakatia; e motu honoa, e motu honoa." Koutou nga mea i tawhiti, hoki mai ki te hono i te taura i motu.

Kia ora nga iwi o ia marae o ia marae.

—Na M. Ratema...

Taupo,

Hune 15, 1926.